

Concierto Dominical Donny Lacle cu tremendo ambiente



Diadomingo, dia 24 di mei 2015, Fundacion pa "Talento Musical "Donny Lacle" a presenta un biaha mas su Concierto Dominical den "The French Steak House" di Manchebo Beach Resort & Spa. Manera semper e concierto aki tabata di 11.00'or di mainta te 01.00'or di merdia.

Esunnan presente a cuminsa un mainta cu musica dushi di wals, toca pa nada menos cu sr. Livio Hermans, kende tin un talento y pasion grandi pa piano. Livio a presenta wals di Chopin y Brahms, sigui pa dos wals di Padú y dr. Oswald Wever y tambe un mazurka di Padú y dr. Wever.

Despues a sigui nos Dama Cultural di Centro di Bario Brasil, sra. Betty Werleman. Compañia pa grupo Sodo y Cuero, Betty a canta e cantica Ulele, cu cua entre otro el a participa na e competencia pa Dama Cultural 2014. Despues el a canta Mamai su cushina, cu el a dedica na su mama.

Sodo y Cuero, cu actualmente ta e unico grupo di tambu activo na Aruba, a laga esunnan presente disfruta di nos musica di antaño cu no tin mag di muri. Sodo y Cuero ta consisti di 6 tocado. Vicente Ras (compositor, cantante y tocado di tambu), Ricardo Maduro (tambu y cantante), Wilbert Maduro



(wiri, corista y cantante), Jose Orman (wicharo, corista y cantante), Lucia Thiel (cantante y corista) y Roberto Orman (wiri y corista) y e dia ey tambe Betty Werlema



como cantante. Nan a toca y canta diferente composicion cu diferente ritmo di tambu di sra. Bernadina Growell-Kock (d.f.m.) y di Vicente Ras.

Durante un pausa cortico cu a sigui e caha di glas a pasa rond den cua esnan presente por a pone un donacion cu na fin di aña lo beneficia diferente talento musical hoben. E ultimo parti di e concierto tabata den man di Chencho y grupo Zjilea, bou maneho di Chencho Kelly y Yosmar Maduro-Sneek. E integrantenan Chencho Kelly (tambu y bongo) Johnny Scharbaay (piano), Humphrey Solognier (cuarta),

Nelson Thiel (raspa), Mario Middendorp (baho), esun di mas hoben, Lydrick Solognier (wiri) hunto cu e coro di trahadonan di Biblioteca Nacional: Elizabeth Loefstop, Astrid Gietel y Yosmar Maduro-Sneek a brinda nos musica crioyo di Aruba cu a crea un ambiente unico y pone masha hopi hende los e pianan.

Comision organizado ta gradici tur esnan cu a coopera cu e concierto aki, incluyendo e personal amable y servicial di e restaurant y esnan cu a bin presencia e concierto aki y ta pidi tur hende pa keda pendiente pa e concierto di fin di juni. □